



বস্টাফ্লিক্স নিউজ



আমরা আগেই আশা করেছিলাম এমনটা হতে পারে। তাই হরমুজ খাল কাটা অ্যাডভান্স শুরু করে দিয়েছি।

দেশের সবচেয়ে অনিয়মিত পত্রিকা

বর্ষ ০১, সংখ্যা ০১

<https://bostaflix.vercel.app>



ছড়িয়ে পড়ছে মিলন ভাইরাস

ডেস্ক রিপোর্ট

সম্প্রতি পাবনা মানসিক হাসপাতাল থেকে রোগী পালানোর কিছু সময় পরই সারা দেশে ছড়িয়ে পড়েছে মিলন ভাইরাস। বিশেষ অজ্ঞরা মনে করছেন সেই পালিয়ে যাওয়া রোগী থেকেই সারাদেশে ছড়িয়ে পড়েছে এই রোগ। সরেজমিনে তদন্ত করে জন্য লক্ষ্য করা যায় যে নতুন করে আক্রান্ত হওয়া রোগীদের উপসর্গ সেই পালিয়ে যাওয়ার রোগীর সাথে মিলে যায়। এজন্যই বিশেষ অজ্ঞদের এই সিদ্ধান্ত। গতকাল এক জরুরি সম্মিলনে এ কথা জানান দেশের বিখ্যাত স্বঘোষিত ডাক্তার আহ-মদ গিগা।

সংবাদ সম্মেলনে তিনি এই বিশেষ ভাইরাসে আক্রান্ত রোগীদের উপসর্গ তুলে দেন। তিনি জানান এই রোগে আক্রান্ত রোগীরা সময়ের কোনো হিসাব রাখতে পারছেন না। বিশেষ করে সাল এবং তারেক পুরোপুরি ভুলে যাচ্ছেন। জিজ্ঞেস করলে কখনও ফ্যাল ফ্যাল করে তাকিয়ে

থাকেন, আবার কখনও ভুল তারিখ বলেন।

আক্রান্তরা সর্বদাই নিজেকে কোনো মহীয়সী ব্যক্তি কিংবা নায়ক মনে করেন। এছাড়াও তাদের কথাবার্তা অসংলগ্ন এবং প্রায়শই কথার মধ্যে মিলন লাগিয়ে দেন। আমাদের সাংবাদিক এর মাঝেও এর একটি উপসর্গ লক্ষণীয় যিনি সম্মেলন কে লিখেছেন সম্মিলন।

এছাড়াও রোগীরা প্রায়শই "এই তোমরা কেমন আছো? বলে চিৎকার করে উঠে।" শোনা পাবনা থেকে সেই রোগীও হাসপাতালটাকে নকল মনে করে নিরুদ্দেশ হয়েছেন।

এই রোগ প্রতিরোধে এবং প্রতিকারে ডক্টর আহ মদ গিগা তার জুতার দোকানে গবেষণা করে কিছু ঔষধ আবিষ্কার করেন। তার এই ঔষধের মধ্যে রয়েছে বিড়িসিটামল ও ডেভিবায়েটিক। এই ঔষধ সেবনে খুব শীঘ্রই তার দোকানের ব্যবসার উন্নতি হবে (জুতা কিনে তাকেই পিটাবে) বলে মনে করছেন তিনি। আমরাও তাই আশা রাখি।

মোম্বা নাসিরুদ্দিনের গল্প (১)

• একবার নাসিরুদ্দিনের এক প্রতিবেশী এসে বললেন, "মোম্বা সাহেব, আপনার গাধাটা কি একটু ধার দেবেন? আমার খুব দরকার।"

নাসিরুদ্দিন গাধাটা দিতে চাচ্ছিলেন না। তিনি মিথ্যা করে বললেন, "ভাই, গাধাটা তো বাড়িতে নেই। অন্য একজন নিয়ে গেছে।"

ঠিক সেই মুহূর্তে ঘরের পেছনের আন্তাবল থেকে গাধাটা জোরে ডাক দিয়ে উঠল। প্রতিবেশী অবাক হয়ে বললেন, "মোম্বা সাহেব, আপনি বলছেন গাধা নেই, অথচ তো ডাক শোনা যাচ্ছে।"

নাসিরুদ্দিন বিরক্ত হয়ে বললেন, "আজব তো মানুষ আপনি! আপনি আমার কথা বিশ্বাস করছেন না, অথচ একটা গাধার কথা বিশ্বাস করছেন?"

মোম্বা নাসিরুদ্দিনের গল্প (২)

• একবার মোম্বা এক বাড়ির ছাদে উঠেছেন চড়ুই পাখি ধরতে। তিনি পা টিপে টিপে এগিয়ে যাচ্ছিলেন যাতে পাখিটি উড়ে না যায়। হঠাৎ করে তিনি ছাদের কিনারা থেকে নিচে পড়ে গেলেন।

নিচে দাঁড়িয়ে থাকা লোকজন দৌড়ে এসে তাকে ধরল এবং জিজ্ঞেস করল, "মোম্বা সাহেব! আপনি এভাবে পড়ে গেলেন কেন?"

নাসিরুদ্দিন গায়ের ধুলো ঝাড়তে ঝাড়তে অত্যন্ত স্বাভাবিক গলায় বললেন, "পড়ে যাব মানে? তোমরা কি ভেবেছ আমি সারাজীবন ওখানেই দাঁড়িয়ে থাকতাম? আমি তো আসলে নিচে নামারই পরিকল্পনা করছিলাম, শুধু সময়টা একটু আগে-পিছে হয়ে গেছে।"

দ্রুত হরমুজ খাল খনন করতে বাংলাদেশ থেকে শ্রমিক নিতে চান ট্রাম্প

নিজস্ব সংবাদক্লেভ, গোয়ার্কি

যুক্তরাষ্ট্র-ইরান যুদ্ধের জেরে হরমুজ প্রণালি বন্ধ থাকায় বিপাকে গোটা বিশ্ব। হরমুজ প্রণালি পুনরায় সচল করার জন্য ট্রাম্পের 'একশো একটা' ফন্দি-ফিকিরের কোনোটিই কাজে লাগছে না। কিন্তু সম্প্রতি তিনি এক 'যুগান্তকারী সমাধান' খুঁজে পাওয়ার কথা তার 'নট অনলি টুথ বাট অলসো আনসোশ্যাল' অ্যাকাউন্টে শেয়ার করেছেন।

গত ১৬ মার্চ বাংলাদেশে শুরু হওয়া খাল খনন কর্মসূচি চোখে পড়েছে ট্রাম্পের। তিনি বলেন, আমি অভিভূত! ৫৩টি জেলায় একযোগে ভার্চুয়ালি খাল খনন দেখে আমি আবার আশা ফিরে পাচ্ছি। শুধু কি তাই? প্রায় এক মাসেই নাকি দেশের অর্ধেক খাল খনন শেষ! আমি আর হরমুজের আশায় থাকব না, নতুন 'হরমুজ' কাটব।

তিনি জোর দিয়ে বলেন যে, এ ব্যাপারে বাংলাদেশি শ্রমিক ছাড়া তিনি কারও ওপর ভরসা করতে পারছেন না। এত স্পিড পৃথিবীর আর কোনো খননকার্যে নেই। 'অ্যান্ড এভরিথিং ইন দ্য ওয়ার্ল্ড দ্যাট ইজ ইউনিক, আই ওয়ান্ট দ্যাট!' বলেন তিনি।

তার পোস্টে এক সাংবাদিক মন্তব্য করেন, শুধু শ্রমিক আনলে কতদিনের মধ্যে বিকল্প হরমুজ খাল কাটা সম্ভব?

ট্রাম্প উত্তরে বলেন, শুধু শ্রমিক আনলেই হবে না। জনাব তারেক রহমান কোদাল হাতে হরমুজ খাল ভার্চুয়ালি উদ্বোধন না করলে কোনো কাজই হয়তো এগোবে না। তা ছাড়া তদারকির জন্য এই প্রজেক্টে ডা. জাহেদ উর রহমানকেও রাখব। হরমুজ তৈরি না হয়ে উপায় নেই। তারপর আবার আমি যতটা অনলাইনে অ্যাক্টিভ থাকি, তাতে ভিডিও কলে বা ভার্চুয়ালি একটা তরমুজ খাওয়ার সময়েই তো মনে হয় খালের সীমানা খনন করা হয়ে যাবে।

ইরানকে টিপ্পনী কেটে তিনি বলেন, ঘুষু দেখেছ, ঘুষুর খাল দেখনি। সবার 'শ্রমিকদের একটি খাল খনন করার' অঙ্ক মিললেও এই বাংলাদেশিদের খাল কাটার অঙ্ক তুমি মিলাতে পারবে না! হঠাৎ দেখবে 'দ্য হরমুজ' কাটা শেষ!

বাংলাদেশের পক্ষ থেকে এ ব্যাপারে তাৎক্ষণিক কোনো প্রতিক্রিয়া পাওয়া যায়নি। তবে ডা. জাহেদ উর রহমান এক ভুয়া বার্তায় বলেছেন, আমরা আগেই আশা করেছিলাম এমনটা হতে পারে। তাই হরমুজ খাল কাটা অ্যাডভান্স শুরু করে দিয়েছি। মনে হয় অর্ধেক হয়েও গিয়েছে! এইসব শ্রমিকদেরও আমরা প্রধানমন্ত্রীর কার্যালয়ের মতো খানা দেব। ভাত, ভেজি ভাজি, লাউ-চিংড়ি, ডিম ভূনা, ডাল। খাওয়ার শেষে মিষ্টি দই। খাল না কাইটো যাবি কই।

শিক্ষা ব্যবস্থায় যুগান্তকারী পরিবর্তন: এসএসসির সিলেবাসে যুক্ত হলো মন্ত্রী মিলন স্টাডিজ

নিজস্ব সংবাদদপ্তর, গ্যোয়াকি

এসএসসি পরীক্ষার আগের রাতেই সিলেবাসে যুক্ত হয়েছে নতুন এক সাবজেক্ট। সিলেবাসে যুক্ত হওয়া নতুন এই বিষয়টির নাম মন্ত্রী মিলন স্টাডিজ। অন্য সব বিষয়ে নকল করে পাস করতে পারলেও এতে কোনো রকম নকল করে পাসের সুযোগ নেই বলেই সিলেবাসে যুক্ত করা হয়েছে বলে শোনা যাচ্ছে।

নকলের হাত থেকে কোমলমতি শিক্ষার্থীদের মুক্ত করার জন্য দরকার এমন একটি সাবজেক্ট, যেটায় আসলে নকলের কোনো সুযোগই নেই। শিক্ষামন্ত্রণালয়ে বেশ কয়েকটি মিটিং শেষে সিদ্ধান্ত

আসে, পরীক্ষায় একদম শেষে আরেকটি নতুন বিষয়ে পরীক্ষা দিলেই তবে শিক্ষার্থীরা ঠিকভাবে পাস করতে পারবে। আর সেই বিষয়টাই হলো মন্ত্রী মিলন স্টাডিজ।

মন্ত্রী মিলন স্টাডিজ মূলত একটি প্র্যাগ্টিক্যাল-বেইজড সাবজেক্ট। মুখস্থ বা নকল কাজে আসবে না। পরীক্ষার হলে বসেই শিক্ষার্থীদের রিয়েল-টাইমে প্রমাণ করতে হবে, তারা আসলেই মন্ত্রীর মতো চিন্তা করতে পারে কিনা।

পরীক্ষার হলে থাকবে ৪টি সিসি ক্যামেরা, ১০ জন ইনভিজিলেটর, এবং ১ জন অপ্রত্যাশিত সাংবাদিক, যিনি যেকোনো সময় ঢুকে লাইভ প্রশ্ন

করতে পারবেন। একজন শিক্ষার্থী বলেন, আগে শুধু খাতা লিখলেই পাস, এখন তো লাইভ পারফরম্যান্স দিতে হবে। মনে হচ্ছে এসএসসি না, মস্তিস্ভায় ঢোকার প্রিপারেশন নিচ্ছি!

মন্ত্রণালয় সূত্রে জানা যাচ্ছে, সারাদেশে যার মার্কস এ বিষয়ে সবচেয়ে বেশি থাকবে, তার জন্য মন্ত্রণালয় থেকে ফ্রিতে হেলিকপ্টার ভ্রমণ, লাফানোর জন্য পোল ভল্ট ও বিভিন্ন আকর্ষণীয় উপহার প্রস্তুত করা হচ্ছে। ভবিষ্যৎ বাংলাদেশের বীজ বপন শুরু হতে যাচ্ছে একটি সাবজেক্ট থেকেই। এ নিয়ে অভিভাবকদের মাঝেও তুমুল উৎসাহ-উদ্দীপনা লক্ষ্য করা যাচ্ছে।

Star Wars-এর পরবর্তী সিনেমায় ব্রাহ্মণবাড়িয়াবাসী

নিজস্ব সংবাদদপ্তর, গ্যোয়াকি

প্রযুক্তিনির্ভর কল্পকাহিনি আর এআই ফরম্যাটে সিনেমা বানানোর প্রতিযোগিতায় যখন বিখ্যাত সব ফ্র্যাঞ্চাইজিগুলো মত্ত, ঠিক তখনই এক বিপ্লব ঘটিয়ে ফেলল ‘স্টার ওয়ার্স’ ইউনিভার্স। তারা তাদের পরবর্তী কিস্তির জন্য মনোনিবেশ করেছে রক্ত-মাংসের জলজ্যান্ত পুরো একটা ইউনিট ব্রাহ্মণবাড়িয়ায়।

স্টার ওয়ার্স ফ্র্যাঞ্চাইজিটির মূল প্রযোজনা প্রতিষ্ঠান লুকাসফিল্মের চিফ ক্রিয়েটিভ অফিসার ডেভ ফিলোনি বলেন, আর কতকাল? আর কতকাল আমরা খরচের ওপর খরচ করব এই ডিএফএক্সের পেছনে? আমাদের এই সিরিজের জন্য যা যা প্রয়োজন, সবই রয়েছে এই ব্রাহ্মণবাড়িয়ার এলাকাবাসীর মধ্যে। মারামারি, পিটাপিটি, লাঠালাঠি থেকে ঠেলাঠেলির এক তীর্থস্থান যেন ব্রাহ্মণবাড়িয়া। সবচেয়ে আশ্চর্য করেছে আমাদের জেলাটির সরাইলের লোকজন। আমাদের এই সিরিজের প্রধান অস্ত্র লাইটসেবার-এর কাজ তারা টর্চ দিয়েই সেরে ফেলল! তাও রাতের আঁধারে! কী মেথড অ্যাক্টিং স্কিল এদের মধ্যে লুকিয়ে আছে, ইউ হ্যাভ নো আইডিয়া! ব্রাহ্মণবাড়িয়াকে মাথায় রেখে কাহিনীর মোড় খানিক ঘুরানোর চিন্তা আমাদের রয়েছে। এবারে



লিউক স্কাইওয়াকার যাবে নগদে রিচার্জ করতে। কিন্তু সেখানে থাকবে ডার্থ ভেডার। সে রিচার্জ করতে চাইবে বিকাশে। কিন্তু দোকানদারের মোবাইলে চার্জ নেই। কারণটা সিম্পল লোডশেডিং। কারেন্ট এলে কার ফোন আগে চার্জ হবে, এই নিয়ে মারামারি শুরু হবে...

অন্য একটি তথ্যসূত্র, পরিচয় গোপন রাখার শর্তে জানিয়েছে, পরবর্তী সিজনিটি হবে নারী-কেন্দ্রিক। প্রিন্সেস লেয়া চরিত্রের জন্য প্রস্তাব দেওয়া যেতে পারে ব্রাহ্মণবাড়িয়ার সাবেক সংসদ সদস্য রুমিন ফারহানাকে।

এ বিষয়ে ব্রাহ্মণবাড়িয়ার জনগণের প্রতিক্রিয়া জানতে আমাদের এক প্রতিনিধি সরাইলে যান। একজন সরাইলবাসী বলেন, একদম ছুলে দেবো রিচার্জ করতে না দিলে!

কবিতা/গান

বিশ্ব রাজনীতিতে তার নাম শুনলে কেউ হাসেন, কেউ বা ভ্রু কুঁচকান। কিন্তু যখন তিনি ডোনাল্ড জে. ট্রাম্প থেকে হয়ে যান 'ডিজে কাকা', তখন সুরের চেয়ে হাস্যরসের তালই বেশি জমে। ডোনাল্ড জে. ট্রাম্পের নামের সেই 'D' আর 'J'-কে মিলিয়ে নতুন প্যারোডি গান।

ডিজে কাকা!

আশরাফুল

দেখলে তেলকে মনে তার কত যে কাহিনী,
তাই পাঠালো ইরানে সে বোমা আর বাহিনী!
ইরানের যে বুদ্ধি আছে,
মিছিল পাঠায় কাকার কাছে,
পড়ে যাবে ট্রাম কাকায়, চিপায় পড়েছে!
ডিজে কাকা! তার ঘাড় বাঁকা!
ব্রেন হাঁটুতে! তার মাথা ফাঁকা!
কথার নাই মাথা, তার চামড়া কমলা!
চায়না কিছু ভালো, চায় শুধু ঝামেলা!
মানুষ মরলেও কিছু যায় আসে না!
ইরানের যে বুদ্ধি আছে,
মিছিল পাঠায় কাকার কাছে,
পড়ে যাবে ট্রাম কাকায়, চিপায় পড়েছে!
ডিজে কাকা! তার ঘাড় বাঁকা!
ব্রেন হাঁটুতে! তার মাথা ফাঁকা!

হাওড়ে মাছ চাষ করতে বললেন উগান্ডার কৃষিমন্ত্রী

নিজস্ব সংবাদদপ্তর, গ্যোয়াকি

হাওর অঞ্চলে বন্যা ও বৃষ্টিতে অনেক কৃষকের ধান নষ্ট হয়ে গেছে। ধান নষ্ট হলেও কৃষকদের আশার আলো দেখালেন উগান্ডার কৃষিমন্ত্রী। সংকটে পড়া কৃষকদের প্রতি গভীর সমবেদনা জানিয়ে তিনি এক ঐতিহাসিক প্রেস ব্রিফিংয়ে বলেছেন, “ধান চাষ করলে তো বৃষ্টিতে নষ্ট হবেই, এটা তো কমন সেন্স! বুদ্ধিমান মানুষ কি আর বৃষ্টির দিনে ধান চাষ করে? এখন থেকে আপনারা হাওড়ে ধানের বদলে মাছ চাষ শুরু করুন।”

মন্ত্রী মহোদয় অত্যন্ত তাত্ত্বিকভাবে ব্যাখ্যা করেন যে, ধান হলো একটি শুকনো পরিবেশের শস্য, যা অতিরিক্ত পানি পেলেই ডুবে নষ্ট হয়ে যায়। প্রাণশক্তিও কম! অথচ মাছকে দেখুন, একেবারে জলবান্ধব। বৃষ্টি হোক আর ঘূর্ণিঝড়, মাছকে কেউ কিছুই করতে পারবে না।

মন্ত্রী বলেন, ধান রোপণ করলে আপনাকে আকাশের দিকে তাকিয়ে থাকতে হয়, আর মাছ চাষ করলে আকাশ আপনার দিকে তাকিয়ে কাঁদলেও কোনো সমস্যা নেই। যত বৃষ্টি হবে, মাছ

তত বেশি সাঁতার কাটার জায়গা পাবে। এটা তো উইন-উইন সিচুয়েশন!

কৃষিমন্ত্রীর এই নতুন তত্ত্ব অনুযায়ী, এখন থেকে কৃষকদের লাঙলের বদলে বড়শি এবং হারভেস্টারের বদলে জাল কেনার পরামর্শ দেওয়া হয়েছে। তিনি আরও জানান, উগান্ডা সরকার এমন এক বিশেষ প্রজাতির মাছ উদ্ভাবনের চেষ্টা করছে, যা পানির নিচে ধান খেয়ে বড় হবে। ফলে ধান নষ্ট হলেও সেই ধানের পুষ্টি মাছের পেটে গিয়ে শেষ পর্যন্ত কৃষকের থালাতেই ফিরবে।